

Was narren vff dem laden stan
Gent sie der wogen eynen druck
Das sie sich gen der erden buck/
Vnd frogen eyne/ wie vil man heysch
Den tumen wigt man zu dem fleysch
Man ert den weg yetz zu der furch
Die alte münz ist ganz hardurh
Vnd möcht nit lenger zyt beston
Hett man jr nit eyn zusatz gethon
Die münz die schwächert sich nit kleyn
Falsch geltt/ist worden yetz gemeyn
Vnd falscher ratt/falsch geystlicheyt
Münch/priester/bägin/blotzbrüder dreit
Vil wölff gont yetz inn schäffen kleidt
So mit ich nit vergeß hie by
Den grossen bschiff der alchemy
Die macht das sylber/golt/vff gan
Das vor ist inn das stäcklin gtan
Sie goucklen/vnd verschlagen grob
Sie kont eyn sehen vor eyn prob
So würt dann bald eyn vncken druf
Der guckuf manchen tribt von huf
Der vor gar sanfft/vnd trucken saß
Der stoßt sin gut ins affenglas
Bis ers zu puluer so verbrent
Das er sich selber nit me kennt
Vil hant also verderbet sich
Gar wenig sint syn worden rich
Dann Aristoteles der gycht
Die ggestalt der ding wandeln sich nicht

f .ij.

